

Anninnia Anninnia

Menzione al Premio di Poesia "Città di Iglesias" 2011

...Dellu dellu, dellu dai, su pipiu miu no morgiat mai...

Ascurta coru stimau custu cantu
est su cantu de una Jana e de bolidus de arrundinis
celus istellaus, contus de tempu antigu, de miradas e de allirghia
contus de amori passau e de ballu tundu
is pilloneddus in su niu bramant sa mamma insoru,
e impari a mei, notesta cantant a tui sa ninnia.

Dellu dellu, dellu dai, su pipiu miu no morgiat mai
mellus chi mi morgiat una vitelledda...
Sonus, musica e ballu de joventudi torrant in sa conca mia
e arregordendi ti seu anninnendi forti in su coru.

Su soli est calendi, acuendisì in lacanas de sonnus
is ogus tuus a pagu a pagu si funti serrendi
e is manisceddadas funti lassendi sa manu mia.

...dellu dellu, dellu dai, su pipiu miu no morgiat mai...
mellus chi si morgiat una vitelledda...
Dromi, anninnia pipiu miu e sonnia,
pipius de su mundu gioghendi a manu pigada.
Mai prus senz' 'e mamma, mai prus solus e in prantu.
Anninnia, anninnia
Pipiu miu, notesta ap'a billai a peis de lettu,
no tengas timoria ssssssss...

Sonnia, sonnia coru stimau
Ap'essi sempri cun tui finzas in s'urtima dì de sa vida mia
Finzas a candu atra Mamma at a pigai in custodia sa vida tua

...Dellu dellu, dellu dai, su pipiu miu no morgiat mai...
Anninnia, anninnia su pipiu miu...sssssss...

In s'aira profumu de vida

Terza Classificata al XI Premio di Poesia "Città di Iglesias" 2009

In sa vida de donniunu
arregorda fillu miu
c'est sempri su bentu,
bentu comenti una stracia.

No ddu depis ascurtai,
est una fèra chi corròxinat
bolit aciapai s'aira
po pustis buchiai
in sa terra frunzia.

Assurta apustis, s'aira
profumat 'e caridadi.
Bellesa chi a s'abetu est ispirada,
bellesa chi sciobèru
cun su coru incantau,
chi t'amostat s'arrexoni
po ti fait biviri in paxi
e fait brintai su soli.

S'aira profumada,
allùit suspirus de amori
e alliviat sa pena de corus fertus.